



Inatsisartunut ilaasortaq,
Jens Napātōk',
Naleraq

§ 37 naapertorlugu apeqqutip nr. 034/2023-p akineqarnera.

Asasara Jens Napātōk',

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Naalakkersuisut apeqqutinnut tullinnguuttumi issuarneqartunut akissuteqartinneqartunullu qujapput.

Apeqqut 1:

Nuummi peqqinnissaqarfimmut sanilliullugu sinerissami misissuisarfimmi maskiinat pitsaassutsimikkut qanoq inissisimappat, assigiinngitsunik misissugassanik aammalu uuttuinnermut soorlu nakorsiaq naarluppat, naartunermi toqunartoqalernerimi imaluunniit inoorlaat sungarpallattut nakkutiginerani imaluunniit assigiinngitsunik peqquteqarluni tinguklut ajoqusernermi?

Akissut:

Nuummi Qitiusumik Aaviisarfimmi, nunap immikkoortuani napparsimavinni aamma Tasiilami napparsimavimmi misissuinerimi atortunik peqarpoq. Aammik misissuinerit amerlasuut Nuummi Qitiusumik Aaviisarfimmi ingerlanneqartarput, atortut pisinnaasaqarluarnerusut atorlugit misissuinissaq pisariaqarmat. Peqqissaavinni tunngaviumik misissuisoqarsinnaavoq. Peqqissaaviit Dr. Ingridip Napparsimmavissuani Qitiusumik aaviisarfimmi atortunut sanilliunneqarsinnaasunik misissuinerimi atortunik atortulersugaangillat. Sumiiffinni ataasiakkaani misissuinerimi atortunik nutaanngitsunik peqarsinnaasarpog. Atortut aserfallaatsaaliorneqarsinnaajunnaaraagata atorunnaarsinneqartarput nutaanillu taarserneqarlutik.

Apeqqut 2:

Qulaani nappaatit taaneqartunut misissuisarfimmi atortut nutaanngilisut sinerissamiittut taarsernissaannut pilersaaruteqartoqarpa?

Akissut:

Atortut pisoqaligaangata - assersuutigalugu misissuinerup ilaani atortut pisariaqartinneqartut atorineqartussat sanaartorneqarunnaaraangata - misissuinerimi atortut nutaanik taarserneqartarput. Misissuinerimi atortunut niuerfimmi ineriartorneq ingerlavoq, atortut annerulerlutillu ajornakusoornerulerput, taakkulu misissuisarfimmi anginerusuni inissinneqartarput, tassami atortut taakku annerit katsorsaanermi teknikkikkut sullissinissamut, akuerisaasumik sullissinissamut, imermik salinissamut il.il. qaffasinnerusunik piomasagaateqarmata. Taamaammallu sumiiffinni minnerusuni atorineqarnissaat tulluurtuunatik.

Apeqquut 3:

Qulaani nappaatinut misissuinissamut sinerissami peqqinnissaqarfinni atortut tamaasa taarsernissaat qanoq akeqassava?

Akissut:

Kalaallit Nunaanni Peqqinnissaqarfimmit paasititsiissutigineqarpoq sinerissami peqqissaavinni misissuinermit atortut tamaasa taarserneqartariaqanngitsut. Atortut aseroraangata atorunnaarneqartussanngoraangataluunniit taarsiineq ingerlaavartumik ingerlanneqartarpoq.

Apeqquut 4:

Avinngarusimasut amerlasuunik nunaqarfillit aamma Tunu nunaqarfippassuaqartoq, napparsimasunik nappaataanik suussusersisinnaanermut maskiinat misissuutit qanoq inissisimappat, soorlu nakorsiaq naarluppat, naartunermi toqunartoqalernermi imaluunniit inoorlaat sungarpallattut nakkutiginerani imaluunniit assigiinngitsunik peqquteqarluni tinguklut ajoqusernermi?

Akissut:

Nunarput tamakkerlugu nunaqarfinni sukkunik aallu procentianik uuttuinermit atorneqartartunik pisariunngitsunik atortoqarpoq. Aammik misissuinerit allat nunap immikkoortuani napparsimavimmi imaluunniit Dronning Ingridip Napparsimmavissuani misissuilluni atortut atorlugit misissugassanngorlugit nassiunneqartarput.

Apeqquut a.

Misissuisarfimmi atortut inerisarnikuuppat aamma ataavartumik aserfallatsaalisaappat, nappaatit suunerinik misissuinissamik pisariaqartumillu katsorsaanissamik ingerlatsinissamik pisinnaatitsisumik, avinngarusimasuniittut ukiumi taartarneranik silarluttaarneranillu tikikkuminaassinnaasuni soorlu Upernavimmi Ittoqqortoormiinilu?

Akissut:

Nunaqarfinni atortut pisariunngitsut aserfallatsaaliorneqarsimapput. Apeqquut 4-mut akissut takuuk.

Inussiarnersumik inuulluaqqusillunga
Med venlig hilsen



Mimi Karlsen

Meeqqanut, Inuusuttunut, Ilaqutariinnut Peqqissutsimullu Naalakkersuisoq